

Z A P I S N I K

sa 4. Tematske sjednice Gradskog vijeća Bihać održane 04.02.2021. godine, (četvrtak) s početkom rada u 16:00 sati u gradskoj vijećnici Grada Bihaća

Predsjedavajući, Zulfikar Handukić, otvara sjednicu Gradskog vijeća i konstatira da je na sjednici prisutno 28 vijećnika.

Za današnju tematsku sjednicu Gradskog vijeća, predsjedavajući predlaže sljedeći:

Dnevni red

- Razmatranje Inicijative Kluba vijećnika PoMAK u vezi organizacije primarne zdravstvene zaštite, nakon što je zgrada JZU Dom zdravlja Bihać proglašena neupotrebljivom zbog opasnosti od urušavanja.
- Razmatranje Inicijative Kluba vijećnika SDA u vezi aktuelne problematike JZU Doma zdravlja Bihać.

Na početku tematske sjednice prisutnim vijećnicima i gostima obratio se Asmir Budimlić, zamjenik predsjedavajućeg. U svom obraćanju zamjenik predsjedavajućeg, Asmir Budimlić je prezentirao podnesene inicijative, iznoseći razloge radi kojih su Klub vijećnika Pomak i Klub vijećnika SDA tražili zakazivanje današnje sjednice, a što su prihvatili svi vijećnici Gradskog vijeća.

Predsjedavajući je upoznao vijećnike da su, u cilju dobijanja relevantnih informacija, na današnju sjednicu pozvani sljedeći gosti:

Nermina Ćemalović - ministrica zdravstva USK-a
Ademir Jusufagić - direktor Doma Zdravlja Bihać
Hamdija Abdić - poslanik SDA u Parlamentu FBiH
Albin Muslić - poslanik SDP-a u Parlamentu FBiH
Hadis Jusić - delegat SDA u Domu Naroda FBiH i poslanik u Skupštini USK-a
Zikrija Duraković - poslanik PoMAK-a u Skupštini USK-a
Fatka Kulenović poslanik SDP-a u Skupštini USK-a
Irma Dedić - poslanik ASDA u Skupštini USK-a
Ilda Alibegović - poslanik u Skupštini USK-a
Vildana Alibabić - poslanik Naše stranke u Skupštini USK-a
Predstavnik firme d.o.o. Euroing Bihać, Samir Grozdanić

Predsjedavajući poziva predstavnika firme d.o.o. Euroing Bihać, Samira Grozdanića, da se prvi obrati vijećnicima i iznese stavove o stručnoj procjeni oštećenja zgrade Doma zdravlja Bihać nastalih kao posljedica zemljotresa.

Predstavnik firme d.o.o. Euroing, Samir Grozdanić, izložio je vijećnicima stanje zgrade Dom zdravlja Bihać, s aspekta stručne procjene oštećenja nastalih kao posljedica nedavnog zemljotresa.

Predsjedavajući poziva Nerminu Ćemalović, ministricu zdravstva USK-a, da obavijesti vijećnike o poduzetim aktivnostima od strane Ministarstva.

Nermina Ćemalović - ministrica zdravstva USK-a, hronološki je iznijela sve aktivnosti koje je resorno Ministarstvo poduzelo od 30.12.2020. godine, i to od raspisivanja poziva za obezbjeđivanje poslovnog prostora u koji bi se izmjestile službe Doma zdravlja, te o ostalim aktivnostima koje je bilo neodložno poduzeti u cilju obezbjeđivanja uslova za adekvatnu primarnu zaštitu građana grada Bihaća u novonastalim okolnostima.

Ademir Jusufagić - direktor Doma Zdravlja Bihać, u svom obraćanju upoznao je prisutne o poduzetim mjerama u cilju organiziranja pojedinih službi u ZU Dom Zdravlja Bihać.

Hamdija Abdić - poslanik SDA u Parlamentu FBiH, osvrnuo se na evidentne novonastale probleme sa kojima se suočava ZU Dom Zdravlja Bihać. Naglasio je da je Federacija izdvojila 3.000.000,00 KM za Dom Zdravlja. Smatra da svi nivoi vlasti u BiH moraju izdvojiti sredstava kako bi se popravio ili, u konačnici, izgradio novi Dom Zdravlja u Bihaću.

Zikrija Duraković - poslanik PoMAK-a u Skupštini USK-a, u svom obraćanju, između ostalog, naglasio je da bi se trebale ubrzati procedure javnog poziva kako bi se osigurao adekvatan smještaj za službe Doma Zdravlja i iste stavile u punu funkciju na zadovoljstvo građana .

Albin Muslić - poslanik SDP-a u Parlamentu FBiH, u svojoj diskusiji je naglasio da je od izuzetnog značaja da se što prije pristupi realizaciji svih poslova koji se odnose na rekonstrukciju ili izgradnju ZU „Dom Zdravlja“ Bihać.

Hadis Jusić - delegat SDA u Domu Naroda FBiH i poslanik u Skupštini USK-a, naglasio je da je Skupština USK-a osnivač ZU „Dom Zdravlja“ Bihać i da ona mora biti pokretač svih aktivnosti. Smatra da se treba izgraditi novi objekat sa racionalnijim i funkcionalnijim prostorom. Pojasnio je da su namjenska sredstva od 3.000.000,00 KM obezbijeđena za izgradnju Doma Zdravlja, a ne za plaćanje kirije, što mora snositi Vlada USK-a.

Fatka Kulenović poslanik - SDP-a u Skupštini USK-a, mišljenja je da nam u ovom trenutku treba jedinstven stav kada je u pitanju Dom zdravlja Bihać, te da svi zajedno moraju naći najbolje rješenje, kako za zdravstvene radnike Doma zdravlja, tako i za građane grada

Bihaća. Na kraju je istakla da se nada da će Federacija izdvojiti značajna sredstva za rješenje problema rekonstrukcije ili izgradnje nove zgrade Doma zdravlja u Bihaću.

Vildana Alibabić - poslanik Naše stranke u Skupštini USK-a, istaknula je da sve procedure vezane za procjenu stanja oštećenja zgrade i ostalih aktivnosti na iznalaženju adekvatnog prostora za izmještanje ZU „Dom Zdravlja“ Bihać dugo traju, što neće biti dobro za primarnu zdravstvenu zaštitu građana grada Bihaća. Predlaže da se formira tim kojeg bi predstavljala stručna lica iz svih institucija, čiji bi zadatak bio da utvrde da li treba graditi novu zgradu Doma zdravlja ili se može pristupiti njenoj rekonstrukciji.

Ilda Alibegović - poslanik u Skupštini USK-a, između ostalog, naglasila je da su svi nivoi vlasti poduzeli sve što je u njihovoj moći za rješavanje nastalog problema vezanog za Dom Zdravlja. Smatra da će problem ZU Doma Zdravlja biti brzo i uspješno riješen.

Nakon izlaganja gostiju, **predsjedavajući Gradskog vijeća**, daje riječ vijećnicima po redoslijedu kako su se prijavili za diskusiju.

Vijećnica Lejla Bakrač

Između ostalog, naglasila je da se sve institucije trebaju uključiti u rješavanje problema ZU Dom Zdravlja Bihać, pa tako i Grad Bihać. U ime Kluba SBB, iznijela je sljedeće zaključke:

1. Neophodno je osigurati sredstava iz Budžeta Grada Bihać za sanaciju ili izgradnju Doma Zdravlja Bihać.
2. Traži se od nadležnih institucija donošenje Odluke o izgradnji nove zgrade Doma Zdravlja Bihać.
3. Traži se od Vlade USK-a da osigura dodatna sredstva neophodna za izgradnju nove zgrade Doma zdravlja.
4. Traži se od direktora Doma Zdravlja da ubrza proceduru najma nove zgrade u koju će biti smješteni svi doktori sa svojim timovima.

Vijećnik Sulejman Kulenović

Između ostalog, naglasio je da nova zgrada Doma zdravlja trebala bi biti u sklopu kompleksa Kantonalne bolnice. Smatra da su izuzetno teški uslovi rada medicinskog osoblja poslije zemljotresa u Domu zdravlja Bihać. Smatra da se problem Doma Zdravlja treba što prije riješiti i za to se adekvatna sredstva moraju obezbijediti sa viših nivoa vlasti, a isto tako i u Budžetu grada Bihać, bez obzira da li se radi o rekonstrukciji ili izgradnji nove zgrade Doma zdravlja.

Vijećnica Šeherzada Delić

Između ostalog, istaknula je da poslanici SDA na Parlamentu FBiH nisu podržali amandman da se izdvoje sredstva za ZU Dom Zdravlja Bihać, iako se deklarativno zalažu za rješavanje

problema ZU Dom Zdravlja Bihać.

Također je naglasila da se mora naći najbolje rješenje kako bi se obezbijedili uslovi za rad i funkcionisanje ZU Dom Zdravlja Bihać.

Vijećnica Maja Uremović

Između ostalog, naglasila je da je u ovom trenutku prioritet da se sve službe Doma zdravlja izmjestе radi sigurnosti zdravstvenog osoblja i pacijenata, i to po mogućnosti u jedan adekvatan prostor.

Vijećnik Elvedin Sedić

U svojoj diskusiji podržao je dosadašnja izlaganja vijećnika i istakao je da su pacijenti u najtežem položaju, jer teško dođu do neophodnih medicinskih usluga u ZU Dom Zdravlja Bihać. Smatra da pacijenti ne mogu čekati dvije ili tri godine kako bi se organizirao rad ove ZU.

Vijećnik Edin Felić

U svojoj diskusiji težište je stavio na probleme zdravstvene zaštite građana Bihaća i probleme organizacije rada Doma Zdravlja. Također, naglasio je da treba izgraditi novu zgradu ZU Dom Zdravlja Bihać, te u tom cilju zatražio je od nadležnih institucija da u što kraćem roku pronađu alternativni prostor za smještaj službi Doma Zdravlja na drugoj lokaciji.

Vijećnik Adnan Lipovača

U svojoj diskusiji predložio je da se Emir Mujadžić imenuje u tim koji će pomoći u rješavanju problema vezanog za izgradnju ZU Dom Zdravlja Bihać. Između ostalog, naglasio je da treba ubrzati postupak dobivanja urbanističko-tehničke dokumentacije za izgradnju nove zgrade Doma zdravlja.

Vijećnik Alen Zulić

U svojoj diskusiji, između ostalog, pohvalio je više nivoje vlasti koji su do sada obezbijedili određena sredstva za Dom zdravlja. Istakao je da je informisan da postoji zemljište u sklopu bolnice kantonalne i da je direktor Havić izjavio da nema ništa protiv da se na zemljištu bolnice izgradi novi Dom zdravlja. Smatra da bi to bilo najbolje rješenje.

Vijećnik Nijaz Malkoč

Između ostalog, naglasio je da treba da se sazove Skupština Kantona i da riješi pitanje izgradnje nove zgrade Doma zdravlja. Također je predložio da bi doktore medicine trebalo rasporediti po ambulancama u mjesnim zajednicama, a što je u interesu građana.

Vijećnik Asmir Budimlić

Između ostalog, naglasio je da treba izgraditi novi Dom Zdravlja. Smatra da je problem kako obezbijediti potrebna sredstva za te namjene. Predlaže da se otvori poseban namjenski račun i da se na taj račun skupljaju sredstva za rekonstrukciju ili izgradnju nove zgrade Doma Zdravlja. Naglasio je da se slaže da se imenuje još jedan član u tim koji će pomoći u pripremama oko pribavljanja svih neophodnih akata za izgradnju ZU Dom Zdravlja Bihać.

Vijećnik Emir Mujadžić

U svojoj diskusiji iznio je stav da, ako su obezbijeđena sredstva od 3.000.000,00 KM , onda treba odmah početi raditi na rekonstrukciji Doma Zdravlja ili na izgradnji nove zgrade na zemljištu Kantonalne bolnice.

Nermina Ćemalović - ministrica zdravstva USK-a, odgovorila je na prijedlog vijećnika Nijaza Malkoča, te je dala pojašnjenja vezana za namjenska sredstva sa nivoa FBiH.

Vijećnik Dinko Bećirspahić

U svojoj diskusiji naglasio je da je potrebno izvršiti premještanje službi ZU Dom Zdravlja Bihać u cilju stvaranja preduslova za nastavak rada ove zdravstvene ustanove u punom kapacitetu. Smatra da Grad Bihać može pomoći u kontekstu zemljišta i u kontekstu komunalija, te s tog aspekta i općenito, Grad treba dati podršku da se Dom zdravlja otpočne što prije graditi.

Vijećnik Halil Bajramović

U svojoj diskusiji je, između ostalog, pohvalio rad ministrice Nermine Ćemalović. Smatra da, ako se gradi novi objekat Doma zdravlja, treba skrenuti pažnju da se izgradi kvalitetan objekat u blizini bolnice. Također smatra da treba odvojiti izgradnju objekta od premještanja službi ZU Dom Zdravlja Bihać, prije svega misli na neophodna finansijska sredstva za plaćanje najma. Podržava prijedlog vijećnika Nijaza Malkoča o raspodjeli doktora po ambulantama u mjesnim zajednicama.

Nakon iscrpljenih rasprava, **predsjedavajući** zatvara raspravu, te objavljuje pauzu od 10 minuta.

Nakon pauze, **predsjedavajući** poziva predstavnike kluba SDA i kluba PoMAK da iznesu zaključke i stavove svojih klubova.

Vijećnik Edin Felić iznosi usaglašene zaključke sa današnje tematske sjednice, i to:

Zaključci

1. Gradsko vijeće Bihać traži od osnivača ZU Dom zdravlja Bihać da donese odluku o izgradnji novog objekta ZU Dom zdravlja Bihać, za potrebe osiguranja higijene i zdravlja građana grada Bihaća.
2. Traži se od Vlade Unsko - sanskog kantona da pokrene proceduru prenosa primarne zdravstvene zaštite sa nivoa Kantona na općine i gradove Unsko- sanskog kantona.
3. Traži se od Vlade Unsko-sanskog kantona da u roku od 15 dana od dana održavanja tematske sjednice Gradskog vijeća, obezbijedi adekvatan i uslovan prostor u koji se mogu prostorno smjestiti sve službe ZU Dom zdravlja Bihać, kako bi 60 000 građana grada Bihaća imalo potpuni pristup primarnoj zdravstvenoj zaštiti. Predlažemo da prioritet pri odabiru imaju objekti u državnom vlasništvu.
4. Vizuelnim pregledom objekta, naknadnim snimanjem deformacija i slijeganja konstrukcije objekta utvrđena su i evidentirana brojna narušavanja mehaničke otpornosti objekta, a kako su mogući i novi potresi, Gradsko vijeće Bihaća, u cilju zaštite 260 zdravstvenih i drugih zaposlenika i pacijenata, traži kontinuiranu aktivnost Vlade Unsko sanskog kantona.
5. Traži se od ZU Dom Zdravlja Bihać da u skladu sa zakonom propisanom procedurom u što kraćem roku izabere ovlaštenu institut/firmu/vještaku koji će u skladu sa pravilima struke uraditi detaljnu seizmičku analizu stanja objekta odnosno analizu mehaničke otpornosti, stabilnosti, sigurnosti i funkcionalnosti objekta kao i pripadajućih instalacija na osnovu čega će dati konačnu procjenu stanja objekta sa konačnim zaključkom - rušenje ili rekonstrukcija objekta. U slučaju rekonstrukcije objekta traži se sveobuhvatna rekonstrukcija, kako bi se objekat mogao iskoristiti za smještaj institucija vlasti i drugih institucija USK-a.
6. Prema mišljenju nosioca izrade preliminarnog izvještaja o pregledu objekta ZU Dom zdravlja Bihać, firme Euroing iz Bihaća, troškovi vraćanja konstrukcije (uključivo i instalacije) u stanje prije potresa iznosili bi oko 3.800.000,00 KM. Troškovi ozbiljne rekonstrukcije sa aspekta povećanja protupotresne otpornosti sa mjerama rasterećenja objekta prema procjenama iznose oko 4.300.000,00 KM, dok se troškovi izgradnje novog objekta (cca 5.000 m²) na drugoj lokaciji procjenjuju na iznos 6.000.000,00 KM. U skladu sa navedenim, Gradsko vijeće Bihać cijeni da je ekonomski opravdanija izgradnja novog objekta ZU Dom zdravlja Bihać.
7. Gradsko vijeće Bihać ovlašćuje Gradonačelnika da formira radno tijelo čiji će zadatak biti da sagleda potencijalne lokacije za izgradnju nove zgrade, prioritarno imajući u vidu mogućnosti izgradnje u krugu Kantonalne bolnice „dr.Irfan Ljubijankić“. Stručni tim će u što kraćem roku pripremiti urbanističko tehničke uslove, izdati lokacijsku informaciju i građevinsku dozvolu za izgradnju novog objekta. Imenovani tim će

također voditi sve aktivnosti u pripremnim radnjama vezanim za izgradnju novog objekta.

8. Vođeni negativnim iskustvom dodjele 4.000.000,00 KM od strane Vlade FBiH na račun Vlade Unsko - sanskog kantona, od kojih Grad Bihać nije dobio nijednu konvertibilnu marku, traži se od Vlade Unsko - sanskog kantona da se otvori poseban namjenski račun na koji će se prikupljati sredstva za izgradnju nove zgrade ZU Dom zdravlja Bihać.
9. Gradsko vijeće Bihać će u skladu sa svojim mogućnostima dati doprinos u postupku izgradnje novog objekta ZU Dom zdravlja Bihać.
10. Gradsko vijeće Bihaća cijeni zalaganje Vlade Federacije BiH i pojedinih predstavnika vlasti iz Bihaća na svim nivoima za rješavanje ovog problema i traži da se izabranu zvaničnici sa područja grada Bihaća na svim nivoima vlasti aktivno uključe u proces izgradnje novog objekta ZU Dom zdravlja Bihać.
11. Gradsko vijeće Bihaća traži od Skupštine Unsko-sanskog kantona da hitno održi tematsku sjednicu na kojoj bi se razmatrala problematika u vezi izgradnje novog objekta ZU Dom zdravlja Bihać i da po uzoru na aktivnosti člana Skupštine USK, koji je i delegat u Domu naroda Federacije BiH, povede aktivnosti u cilju obezbjeđenja sredstava za izgradnju novog objekta.
12. Gradsko vijeće Bihać traži od Gradonačelnika da u roku od 3 dana od dana održavanja tematske sjednice, dostavi Vladi Unsko-sanskog kantona ime i prezime dipl.ing. građevine, koji će ući u sastav koordinacionog tijela Vlade Unsko-sanskog kantona u vezi izgradnje novog objekta ZU Dom zdravlja Bihać.

Predsjedavajući predložene zaključke daje na usvajanje.

Predloženi zaključci usvojeni su jednoglasno, sa 28 glasova ZA.

Predsjedavajući zaključuje tematsku sjednicu održanu dana 04.02.2021. godine u 19 sati i 56 minuta.

Po ovlaštenju Gradonačelnika
Broj:02/1-30-235/21 od 19.01.2021
Sekretar Gradskog vijeća
Elvira Kulenović, dip.pravnik

Predsjedavajući GV
Zulfikar Handukić